

Communicaziun allas medias digl cumegn da Surses (nr. 10-2020)

Surses 2030: retschertga online davart igl process participativ digl model directiv

Nous vivagn igl mument ainten en taimp spezial tgi pretenda an divers gros ena gronda flexibilitad. Uscheia er an connex cun igl process per elaborar igl model directiv digl cumegn da Surses, tgi è nia lantschea. Cunchegl tgi l'occurrènz d'infurmaziun cun luvratori ò stuia neir annullo perveia dalla situaziun actuala da Covid-19, vign la populaziun ossa integrada cun ageid d'ena retschertga online. Aint igl center stattan las dumonda, tge valours e tematicas tgi vignan ad esser impurtantas an futur pigl Surses e scu tgi chellas duessan neir contanscheidas.

An tge direcziun duess sa sviluppar igl cumegn? Tge fegnameiras persequitescha el an sies camps d'acziun? E cun tge maseiras vignan contanscheidas resp. sieradas chellas fegnameiras? Per survagneir raspostas liontas a chellas dumondas ègl impurtant tgi la populaziun sa participescha da moda activa agl process. Gioven e vigl, indigen u sagond-indigen, angaschea politicamaintg u angal interesse - ple persungas tgi espriman igl sies meini e sa participeschan alla retschertga online e pi signifitgant tg'igl resultat vign ad esser. Igl model directiv e las maseiras correspondentas servan agl cumegn an futur scu instrumaint da planisaziun. Igl process ò alloura success, sch'igl model directiv vign sustigna e vivia dalla populaziun.

La retschertga online sa basescha sen prediscurs specifics tar 8 camps d'acziun scu er dallas reflexiuns digl comite directiv (represchentants dalla populaziun) e dalla suprastanza communal. Igl ampren resultat intermediar cumpeglia igl status quo scu er en'amprena proposta per visiuns/fegnameiras e maseiras. La populaziun vign ossa anvidada da far dumondas, da cumplettar u stritgier, da commentar e da valetar las propostas elaboradas.

Digls resungs consolidos vign fatg anfignen la premaveira 2021 en model directiv pigl cumegn scu er en catalog da maseiras priorisadas.

Igl questiunari online vign activo a parteir da glindesde, igls 14 da december anfignen venderde, igls 15 da schaner 2021. Mesemda, igls 16 da december 2020, allas 20.00, vign salvada ena preschentaziun online pertutgont las infurmaziuns da basa tgi èn neidas elaboradas anfignen ossa. Daple infurmaziuns, igl questiunari scu er videos cun explicaziuns davart igls singuls camps d'acziun; scu er en saleid digls commembers digl comite directiv via video ed er ulteriouras infurmaziuns pertutgont igl process digl model directiv vignan activos ed actualisos sivamang sen **2030.surses.ch**.

Igl team da project sa legra d'ena numerosa participaziun e sen igls resungs prezios dalla populaziun!

Infurmaziuns:

Leo Thomann, leo.thomann@surses.ch, 081 659 11 61

Linda Netzer, l.netzer@savognin.ch, '81 659 16 05

Tinizong, 18-11-2020

Maletg: project da mussaveia, segn da senda da viandar cun sguard an direcziun digl pass Lunghin e digl pass digl Set.

